


TEZAU LITURGIC
19 SEPTEMBRIE

SLUJBA
SF. PREOT-MUCENIC
CONSTANTIN
GOLUBEV
DE LA
BOGOROD



MOSCOVA, 2000



Сентября в 19-й день Служба священномученику Константину Богородскому

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихиры святого на 8, глас 4. Подобен: Дал еси знамение:

Беззаконных шатания / и демонская служения /
в страданиях твердостью, Константине,
низложил еси, / Спаса всех ясно возвещая / и
верных просвещая мысли, богоблаженне, / и
мрак отгоняя идольскаго суетства словесы
твоими / и подвигов светлостью.

Образ пастыря добраго был еси,
священномучениче блаженне, / о стаде
Христове попечение неленостно имый, /
Богородския земли похвало и Российския земли
утверждение, / и всея вселенная удобрение. /
Темже сердцем и усты тя, священномучениче
Константине, ублажаем / и радующеся вопием:
/ слава Божию еже о нас смотрению.

Крест Господень взем, священномучениче
Константине, / истинно последовал еси Христу,
/ нас ради на кресте распеншемся, / и Его
ради любви вся земная и тленная оставил еси, /
и Того Единого возлюбил еси. / Егоже моли

спастися нам.

Священномучениче отче Константине, / вельми
тя Христос прослави / и дарова тебе слово
Божественнаго разума, / имже отсека еси лжу
от истины / и исторга еси плевелы неверия, / и
научил еси славити Троицу Единосущную, /
покланяемаго в Трех Ипостасех Единого Бога.
/ Того убо моли, священномучениче, / даровати
просящим исцеление, мир и велию милость.

Кую похвалу принесем ти, святе Константине? /
Яко цвет благоуханен Церкви Христове явился
еси, / неустанно бо учил еси люди познанию
веры Христовы, / грешников приводя к
покаянию, / тайная человеческого сердца
ведый, / и будущая яко настоящая зрел еси, / и
чада твоя вся подвигнул еси терпети за Имя
Христово, / темже молитвами твоими,
блаженне, дарует Спас наш верным велию
милость.

Светло ликует ныне страна Российская, /
прославляючи святую память твою, / отче
Константине, / тя бо новаго молитвенника сия
обрете / и теплаго предстателя у Престола
Божия, / скорого в бедах заступника и
немоцным врача безмезднаго. / Слава
Даровавшему ти благодать исцелений, / слава
Прославльшему тя, / слава Прославляющему
тобою Святую Церковь Свою.

Добродетельми просвещаяся, благочестием
украшаемь, пресвитер Божественный был еси, /
и яко многосветлое солнце, мир протекл еси, /
насевая всюду веры проповедание, / раскол же
искореняя серпом твоего языка, / пресвитере
богомудре, великопроповедателю Константине.
Благовернаго князя Константина имя носил еси
/ и, его житию последуя, / благоверия лучами
просвещая град Богородск и ересей тьму
отгоняя, / миру благое украшение, /
огнепальные стрелы демонския поправил еси, / и
превыше всякия добродетели быв, /
соводворяешися во Царствии Небеснем с
горними чины: / с ними молися о нас Христу
Богу, святе Константине.

Слава, глас 8:

Приидите, архиереи, священницы и
христоименитии людие, / со страхом и трепетом
/ предстанем раце мощей новаго мученика
Константина, / твердаго исполнителя поста и
молитвы, / строгаго хранителя церковных
преданий, / истиннаго проповедника
Божественнаго Евангелия, / вернаго пастыря
стада Христова, / христианского благочестия
истиннаго ревнителя, / ересей и расколов
искоренителя, / безбожия грознаго обличителя,
/ на свещнице церковнем верою и любовью
горящаго, / согревающего вся притекающия к

раце мощей его / и указующаго путь иже ко спасению душ наших.

И ныне, глас тойже:

Царь Небесный / за человеколюбие на земли явился / и с человеки поживе: / от Девы бо Чистыя плоть приемый / и из Нея прошедый с восприятием, / един есть Сын, сугуб естеством, но не Ипостасию. / Темже совершенна Того Бога / и совершенна человека воистинну проповедающе, / исповедуем Христа Бога нашего; / Егоже моли, Мати Безневестная, / помиловатися душам нашим.

Вход. Прокимен дне. Чтения три мученическая.

Пророчества Исаиина чтение (глава 43):

Тако глаголет Господь: / вси языцы собращася вкупе, и соберутся князи от них, кто возвестит сия в них? / Или яже от начала, кто слышана сотворит вам? / Да приведут свидетели своя и оправдятся, / и да услышат, и да рекут истину. / Будьте Ми свидетели, и Аз Свидетель, глаголет Господь Бог, / и отрок, егоже избрах. / Да познаете и веруете Ми, и разумеете, яко Аз есмь: прежде Мене не бысть ин бог / и по Мне не будет. / Аз есмь Бог и несть, разве Мене, спасаю, / Аз возвестих и спасох, / уничижих и не бе в вас чуждий. / Вы Мне свидетели, и Аз

Господь Бог, / и еще от начала Аз есмь, / и несть от рук Моих избавляяй. / Сотворю, и кто отвратит то? / Сиче глаголет Господь Бог, / избавляяй вас Святыи Израилев.

Премудрости Соломоновы чтение (глава 3):
Праведных души в руке Божией, / и не прикоснется их мука. / Непщевани быша во очесех безумных умрети, / и вменися озлобление исход их: и еже от нас шествие сокрушение, / они же суть в мире. / Ибо пред лицом человеческим, аще и муку примут, / упование их бессмертия исполнено. / И в мале наказани бывше, великими благодетельствовани будут, / яко Бог искуси я и обрете их достойны Себе. / Яко злато в горниле, искуси их, / и яко всеплодие жертвенное прият я. / И во время посещения их возсияют / и яко искры по стеблию потекут. / Судят языком и обладают людьми, / и воцарится Господь в них во веки. / Надеющиися Нань разумеют истину, / и вернии в любви пребудут Ему. / Яко благодать и милость в преподобных Его, / и посещение во избранных Его.

Премудрости Соломоновы чтение (глава 4):
Праведник аще постигнет скончаться, в покои будет. / Старость во честна не многодетна, /

ниже в числе лет исчитается. седина же есть
мудрость человеком, / и возраст старости житие
нескверное. / Благоугоден Богови быв,
возлюблен бысть / и живой посреде грешник
преставлен бысть. / Восхищен бысть, да не
злоба изменит разума его / или лесь прельстит
душу его. / Рачение бо злобы помрачает добрая
/ и парение похоти пременяет ум незлобив, /
Скончався в мале, исполни лета долга, / угодна
бо бе Господеви душа его, / сего ради потщася
от среды лукавствия. / Люди же видевшие, и не
разумевшие, / ниже положше в помышлении
такое, / яко благодать и милость в
преподобных Его / и посещение во избранных
Его.

На литии стихиры, глас 5:

Воссиял еси, яко звезда лучезарная, / и в
Церкви Российстей светом Христова учения /
ревностию твоею о славе Божией, достохвальне,
/ тьму нечестия разгнал еси / и
еретичествующих посрамил еси лукавое
мудрование, / проповедию твоею славною
обращая заблуждших ко спасению, / в темнице
заключенным бываяй утешение, / чадом тебе от
Господа вверенным охранение и защищение; /
мы же недостойнии, не могуще добродетели и
подвиги твоя изчести, / умильно вопием тебе: /

досточудне отче Константине, спасай нас
молитвами твоими.

Стих: Праведник, яко финикс, процветет, / яко
кедр, иже в Ливане, умножится.

Кровию мученическою обагрив твою священную
одежду, / вшел еси во святая святых, /
Константине славне, / и ныне наслаждаешься
обожения, / добродетельми украшаемь и
мучением сияя, / и ангел показуяся чистейшими
причащению. / Тем тя почитаем и любовь
празднуем / твое священнейшее торжество,
достоблаженне.

Стих: Насаждени в дому Господни / во дворех
Бога нашего процветут.

Блаженне и чудне, / мужу желаний Господних /
и заповедей Его ревнителю, / святе
Константине, / молися о присно воспевающих
тя.

Слава, глас 6:

В Церковь Небесную / священно вшел еси, /
священно обливаемь, блаженне, кровию, / и
Троице предстоиши, / богато сияя нам
блистании истекающими, пребогате, / темже
днесь, священномучениче, / твою память
совершающе, / чувства души просвещаем.

И ныне, глас тойже:

Тучами Духа Пресвятаго, Пречистая, / мою
мысль ороси, / яже каплю рождающая Христа, /

неизчетно безмерная беззакония человеком
щедротами измывшую: / изсуши источник
страстей моих / и сподоби мя пищи животныя
присно / молитвами Твоими.

На стиховне стихиры, глас 6:

Сущих во тьме и сени смертной / премудрый
просветитель, о спасении людей, / в пучине
греховней потопляемых, / благостный
попечитель, / не ведущих Бога и окамененных
сердцем к покаянию побуждая, / сердец
строптивых и злонравных благостное умягчение,
/ ленивых и коснеющих совестию милостивое
обличение, / слова Божия и правды Его
проповедник неустрашимый, / житием
благонравным козни духов злобы поднебесных
победивый ты еси, Константине, / земли
Российския молитвенниче предивный.

Стих: Священницы Твои облекутся в правду, / и
преподобнии Твои возрадуются.

Сеятелю правды, / слезами твоими землю нашу
освятивый, / обличителю неправды, души
верных / от прелести греховныя свободивый, /
свете сердец кротких и разумных, / путь к Богу
указуй, ученьми твоими, / яко кормилица
кроткая, / нас греяй и питай, и греховное
злосмрадие потребляя, / молися о нас, отче
Константине.

Стих: Блажен муж, бояйся Господа, / в заповедех Его восхоти зело.

Силою благодати, яже в тебе, / немощнии духом в любви Божией укрепляются / и твоими молитвами кающиеся плена греховнаго свободяются, / труды твоими алчущии и жаждущии правды Христовы насыщаются, / благовестием твоим врази Церкви посрамляются, / молитвами твоими силы ада низлагаются, / воздеянием рук твоих врата небесная верным отверзаются. / Умилоствление за народ наш молитву, / яко кадило благовонное, / херувимски Богу приносимый, / не остави и нас молитвами твоими.

Слава, глас 8:

Богоизбранный и богопрославленный пастырю земли Российския, / восславил еси Имя Божие, / пророком и апостолом добре поревновавый, / бежати гнева Божия / и творити плоды покаяния мудре наставивый, / о Отечестве и людех его теплый молитвенниче, / веры православныя славный ревнителю, / яко пресветлая луча, / просиял еси, путь к Жизни Вечней озаряя, / неисчерпаемую благодать Божию нам открывая, / учителю правды Божия, / еюже вси христолюбивии людие украшаются. / Темже вопием тебе: / поминай нас в твоих

молитвах, священномучениче преславне.
И ныне, Богородичен воскресен:
Безвестная Дево, / Яже Бога неизреченно
заченши плотию, / Мати Бога Вышняго, / Твоих
рабов мольбы прими, Всенепорочная, / всем
подаючи очищение прегрешений: / ныне наша
моления приемлющи, / моли спастися всем нам.

Тропарь, глас 4:

Украшение священников явился еси
Константине, / восприем бо крест яко оружие, /
проповедию славною устраняя раскол и ереси, /
благовествовал еси Иисуса Христа глаголя: /
спасайтесь от рода сего развращеннаго. / Сего
ради мученическою кровию обогрися славне, / и
ныне радуяся с лики ангельскими, моли Христа
Бога / Церковь Всероссийскую от ересей и
расколов сохранить / и спасти души наша.
Слава, и ныне, Богородичен гласа.

НА УТРЕНИ

На Бог Господь: тропарь святаго, дважды.
Слава, и ныне, Богородичен.

По 1-й кафизме седален, глас 3.

Преславным веры исповеданием / прелести
угасил еси злославие, обличив идольское

безбожие, / и всесоужение Божественное быв, /
чудотворением озаряеши концы, отче
преподобне. / Христа Бога моли даровати нам
велию милость. (Дважды).

Слава, и ныне, Богородичен:

Божественная скиния была еси Слова, / Едина
Пречистая Дево Мати, Ангелов честнейшая, / и
мене паче всех осквернена прегрешеньми
многими, / очисти молитвами Твоими, /
подаючи, Чистая, велию милость.

По 2-й кафизме седален, глас 4.

Воссияв якоже солнца заря, / блистаеши,
преподобне, всему миру светло учении твоими, /
богогласе Константине светоносне, мучеником
похвало. (Дважды).

Слава, и ныне, Богородичен:

Пречистеи руце Твои, Дево Мати, простерши, /
покрый покровом Твоим уповающия на Тя и
Сыну Твоему зовущия: / всем подаждь, Христе,
милости Твоя.

По полиелеи величание:

Величаем тя, / священномучениче Константине,
/ и чтем честная страдания твоя, / яже за
Христа претерпел еси.

Псалом избранный: Услышите сия вси языцы:

По полиелеи седален, глас 8. Подобен:

Премудрости:

Окормляемь силою вседетельною / и ветрилом
окриляемь крестным, / преплыл еси житейское
море / и к Божественному пристанищу
воистинну достигл еси, / добродетелей куплю
многу сотворив, / ихже Владыпе всех принесл
еси, / и еже "благий рабе" слышал еси, и сим
последующая: / темже, Константине блаженне,
моли Христа Бога грехов оставление подати /
чтущим любовьию святую память
твою. (Дважды).

Слава, и ныне, Богородичен:

В напасти многоплетенныя впад / от враг
видимых и невидимых, / бурю одержимь
безчисленных согрешений моих, / и, яко к
теплому защищению и покрову моему, Чистая, /
ко пристанищу притекаю Твоя благости. /
Темже, Пречистая, из Тебе Воплощенному
безсеменно молися прилежно / о всех рабех
Твоих, непрестанно молящих Ти ся, Богородице
Пречистая, / молящи Его присно согрешений
оставление даровати / воспевающим достойно
славу Твою.

Степенна, 1-й антифон 4-го гласа.

Прокимен, глас 4: Честна пред Господем /
смерть преподобных Его.

Стих: Что воздам Господеви о всех, яже воздаде ми?

Всякое дыхание: Евангелие от Луки, зачало 106.

По 50-м псалме стихира, глас 6:

Поюще твое достохвальное житие на земли / и славу юже стяжал еси на Небеси, / молим тя, прехвальне Константине, / вознеси о нас молитвы к престолу Пресвятыя Троицы, / да помиловани будем в День Судный / и спасаеми твоими молитвами, / радостию вопием тебе: / радуйся, силою молитвы твоея чистыя узы супружеския укрепляяй, / радуйся, крине, присно благоухаяй, росою благодати Божия напоенный, / радуйся, истиннаго просвещения и христианскаго благочестия ревностный насадителю, / радуйся, порфирою покаяния всех облакаяй, / радуйся, диадимою благодати славно увенчанный, / радуйся, прехвальный Константине, земли Богородския молитвенниче предивный.

Канон святаго, глас 8.

Песнь 1

Ирмос: Воду прошед яко сушу / и египетскаго зла избежав, / израильтянин вопияше: / Избавителю и Богу нашему поим.

Припев: Святой священномучениче

Константине, моли Бога о нас.

Светом Христовым просвещаемь, расколы и ереси искореняя, / священномучениче славне Константине, / молитвами твоими, преблаженне, омраченную душу мою просвети, / яко да воспую тя.

Лествицею добродетелей на Небеса возшел еси, / тем и Христос ты, священномучениче, еще на земли суща, / в меру возраста духовнаго приведе / и земли Саратовския наставника постави.

О, радости наша, Константине пресвитере, / великия твоя апостольския подвиги и труды почитаем, / ты бо многия приходящия к тебе научил еси / право воспевати Единосущную Троицу.

Богородичен: Даждь нам помощь мольбами Твоими, Пречистая, / прилоги отревающи лютых обстояний.

Песнь 3

Ирмос: Ты еси утверждение / притекающих к Тебе, Господи. Ты еси Свет омраченных, / и поет Тя дух мой.

Всесовершенну жертву живу / себе Христу принесл еси мучением, / совестью мученическою, / прежде пострадав воздержанием.

Господь призва ты в землю Богородскую, / и житием явился еси, Константине, образ благочестия, / люди православныя ко спасению приводя, / и Церкви Христовы великий пресвитере, / темже память твою вернии сошедшеса любовью почитаем.

Управив богоразумно, преподобне, ум твой, / заповедей Спасовых делателю нелицемерный в житии твоём бываяй, / темже славный воин Христов явился еси / и мученик добропобедный. Богородичен: Подаждь нам помощь мольбами Твоими. Пречистая Богородице, / от скорбей находящих на ны / и печалей многих, Пречистая, избави.

Седален, глас 3:

Божественным духом просвещен, / свирепство мучителей безбожных дерзновением пастырским, богомудре, посрамил еси, / и, прешед прелести пучину, / ко пристанищу Божественному достигл еси; / отче Константине, Христа Бога моли / даровати нам велию милость.

Слава, и ныне, Богородичен:

Кийждо идеже спасается, / тамо праведно и притекает: / и кое иное таковое прибежище, / яко Ты, Богородице, / покрывающее души

наша.

Песнь 4

Ирмос: Услышах, Господи, / смотрения Твоего таинство, / разумех дела Твоя / и прославих Твое Божество.

Красуйся, граде Богородск, / имея молитвенника твоего, / священномученика Константина, / молящагося присно о душах наших.

Стадо Христово, священномучениче, наставляя к свету богоразумия, / безбожия тьму отгнал еси.

Безбожных нечестие / труды и поты твоими / и преславными мучении, отче, / яко священномученик посрамил еси.

Богородичен: Ты похвала христианом еси, Владычице, / и стена к Тебе прибегающим, / Тя и ныне на помощь призываем, Госпоже: / от обдержавших нас бед, спаси души наша.

Песнь 5

Ирмос: Просвети нас повелении Твоими, Господи, / и мышцею Твоею высокою, / Твой мир подаждь нам, Человеколюбче.

Твое богомудрое наставление, Константине славне, / яко мед сладкий бывающе всем к тебе приходящим: / ты бо, по глаголу апостолу, /

горняя, а не земная всегда мудрствовати люди учил еси.

Жезлом веры отгоняеши ересей и расколов ловитвы / и союзом любве спряг стадо твое, / надеждою и верою сохраняеши невредно.

Священнаго Писания от юности научився, богоносне Константине, / ралом словес твоих окаменевшая богородских людей сердца возделал еси, / и Божественное семя в них всеяв, / плод красный Христу принесл еси.

Богородичен: Теплая Заступнице к Тебе прибегающим и ненадеющихся Надеждо, / виждь скорбь людей Твоих / и милость Свою яви, Пречистая.

Песнь 6

Ирмос: Молитву пролию ко Господу / и Тому возвещу печали моя, / яко зол душа моя исполнися, / и живот мой аду приближися, / и молюся, яко Иона: / от тли, Боже, возведи мя.

В Царство Небесное вшед узким путем и прискорбным, по заповеди Владыки своего Христа, / священномучениче отче Константине, / широкий и пространный путь возненавидев, / ум мой помраченный просвети, / да возмогу малое мое моление принести, совершая днесь пречестную память твою.

Каменю веры, Петру апостолу уподобился еси, /

распялся еси миру во всем житии твоём,
священномучениче, / и нозе свои невозвратно к
Небесному шествию управил еси, / ныне со
святыми предстоя Святей Троице, / моли о нас
Единого Благаго Человеколюбца.

Не отвратися, Господи, от моления сего, / ниже
помяни множество грехов наших, / паче же
помяни древняя Своя милости, и ради
благоутробия Твоего, / и ради Константина
страдальца добляго, / не лиши нас обетованных
Твоих милостей / и подаждь прощение
прегрешений наших.

Богородичен: Лютых мя мук и тьмы кромешных,
/ и геенны Твоими молитвами свободи, Дево, /
имаши бо волю и силу, / Господа рождающая,
Единого Преплагаго.

Кондак, глас 4:

От младенчества к Богу устремився, /
благочестия ревнителю и раскола искоренителю,
/ священномучениче Константине, / Христа
мужественно исповедав, / жесточайшая
мучения приял еси, / Церкви Русския благое
украшение, / моли Христа Бога / грехов
оставление подати / чтущим любовь святую
память твою.

Икос:

Павлову словеси поревновав, всехвальне
Константине, / песньми почтил еси российских
пастырей, / приснобдящих пред Престолом
Небеснаго Царя о нашем Отечестве, / с нимиже
радуяйся ныне, учителю и наставниче, / моли
Христа Бога / сохранится нам в вере и
благочестии невредимо.

Песнь 7

Ирмос: От Иудеи дошедше отроцы, / в Вавилоне
иногда / верою Троическою пламень пещный
попраша, поюще: / отцев Боже, благословен еси.
Милосердия и помощи Спаса и Господа чаяй, /
егда призван был из земли Саратовския, /
прешел еси, Константине, подвизатися в град
Богородск. / Похваляюще дерзновение твое,
вопием: / отцев наших Боже, благословен еси.
В Богородске граде от святителя Тихона чин
иерейский получив, / помале первый среди
иереев поставлен был еси, / и тамо непрестанно
о душах человеческих попечение имея, /
собратьев и мирских наставляя еси, / како по
заповедем Божиим жити, / да благословен будет
Бог отец наших.

В темнице заблуждших посещая, / учил еси их
прилежно творити молитву Господню, / и сим
исправил еси нерадивых и обратил тех ко

Господу, / Емуже вси вернии возопиим: / отец наших Боже, благословен еси.

Богородичен: Узы смерти и ада Расторгшаго, / страдании, смертию и воскресением / род человеческий от вечнаго осуждения Спасшаго Мати, / Того моли, да прощение грехов всем верным дарует.

Песнь 8

Ирмос: Царя Небеснаго, / Егоже поют вои Ангельстии, / хвалите и превозносите во вся веки.

Егда вознеслся еси на Кресте, Слове, / абие предста Жертва Сыновняя, / завеса церковная раздрася: / был еси, Спасе, Сам прежде заклан от людей злочестивых, / предводя вся во образ Твой и за имя Твое умученныя, / ихже память ныне прославим.

Оле нечестия богопротивных, на Владыку Кроткаго руки простерших, / ихже не ужасе ни тьма полуденная, ни трус, / ни воскресших явление, ниже самое Владычне востание, / но на горшее паки простирахуся, / в беззаконием праведников заклании паки страсти Христове ругатися мняху, / тии же незлобием агнчим в смерти своей Агнца Божия величаху.

О преславнаго чудесе! / Како святии загражденными усты обличают жестосердие, /

како кровей своих течением заграждают потоки беззакония, / нас же подвизают ко трезвению, памяти смертней непрестанней и небоязненному истины исповеданию?

Богородичен: Твоею, Дево, всечестною иконою древле Творец всех чудодействова, / спасе град наш Богородск от нахождения иноплеменник, / сице и земли нашей буди, Госпоже, покров и заступление.

Песнь 9

Ирмос: Ужасеся о сем Небо, / и земли удивишася концы, / яко Бог явися человеком плотски, / и чрево Твое бысть пространнейшее небес: / тем Тя Богородицу / Ангелов и человек чиновначалия величают.

Киими песньми святыми воспоем священномученика Константина, / кровьми своими страсть Христову изобразивша, / злостраданьми Ему уподобившася?

Целомудрию твоему и чистоте поругатися ищуще, / безбожнии бесоводимии тя избраша, отцу своему диаволу пожрети желающе, / но явился еси жертва Господеви непорочная, спострадалец Спасов.

Божественное бысть некое Смотрение в безвременней лютей кончине твоей, отче, / да страдания твоими, вкупе же и сонма новых

мучеников, утвердится Церковь Российская, /
обновится и славно украсится, Жениху Своему
Христу предстоящи. / Мы же, подвиги твоя
зряще и День Судный помышляюще, /
восплачем о себе горько.

Богородичен: Прегрешения моя умножишася, /
прещения и суда достоин сый, Чистая, /
припадая зову Ти: / прежде конца подаждь ми
очищение и умиление, и нравом исправление.

Светилен, глас 6.

Яко иерей Божий, / на земли вязати и решати
имеяй власть. разреши зол моих союз, / и к
любви Божией причти мя / и Царствия
причастника, блаженне, соделай молитвами
твоими.

Богородичен: Просвети, Чистая, душу мою
омраченную / и вечнующаго мя пламене и
мрака избави ходатайством Твоим, яко да с
веселием хвалю Твое величие.

На хвалитех стихиры, глас 6.

Благодать желанную, священномучениче, / нося
Небесную земная же небрегл еси: / сего ради,
яко безплотен, / страдальческое избрал еси
житие, / яко присносущнаго потока пищи /
благонасладиться хотя богоприятне, / и слезами
изсушил еси / мутный источник страстей, / и

напоил еси душепищныя класы.

Любовию и надежду вооружився / и верою
огражден, / разорил еси хитрости и коварства
вражия, / и победитель быв, ныне венценосец
живеши / с Божественными лики Ангел и
преподобных окрест Престола всех Царя.

Мир церквам испроси, священномучениче,
твоими молитвами, / Отечеству нашему помощь
на сопротивныя, / и рог Российския земли
возвыси, блаженне, / предстоя Престолу Святыя
Троицы, / да присно тя ублажаем.

Малое сие и смиренное хваление приими,
священномучениче, / от недостойных устен и
мерзкаго моего языка, / и от сердца нечиста: /
ты бо, Константине преславне, / преочищенный
душею и телом, / паче солнечных лучей облистал
еси, / Божия заповеди совершив, / и к Свету
Невечернему преставился еси. / Верно тя
чтущим молися / подати оставление грехов, /
отче блаженне.

Слава, глас 4:

Нов сад якоже маслина, / на Божией трапезе
положился еси, / яко сын ходящих по пути
Господню: / мучения ради благослови тя
Господь, / и узриши благая Вышняго Сиона, /
наслаждая Божественнаго радования со всеми
святыми, / священномучениче Константине,
достопетый: / имже общники нас быти /

мольбами твоими сотвори.

И ныне, Богородичен, глас тойже:

Богородице, всех Царице, / православных
похвало, / еретичествоующих шатания разори /
и лица их посрами, / не поклоняющихся Тебе,
ниже чтущих, Пречистая, / честный Твой образ.

НА ЛИТУРГИИ

Блаженны на 8, песни 3-я и 6-я,

Прокимен, глас 7: Восхвалятся преподобнии во
славе и возрадуются на ложах своих.

Стих: Воспойте Господеви песнь нову, хваление
Его в Церкви преподобных.

Апостол ко Евреем, зачало 334.

Аллилуиа, глас 2-й: Священницы Твои оденутся
в правду, / и преподобнии Твои возрадуются.

Евангелие от Луки, зачало 67.

Причастен: В память вечную будет праведник:

[Бденная служба священномученику

Константину Голубеву (†1918) составлена

протоиереем Василием Извековым в 1997

году]